

ZAPISNIK

Predsjednica Skupštine Udruženja „ORIGINAL“ za ostvarivanje i zaštitu reprodukcijских prava, Lejla Alić sazvala je drugu redovnu sjednicu Skupštine na dan 18.12.2017.godine u Sarajevu, s početkom u 12:00 sati.

Za zapisničara je imenovana Lejla Gačanica, generalna sekretarka Udruženja.

Skupština je održana u Muzeju književnosti i pozorišne umjetnosti, Sime Milutinovića Sarajlije 7, Sarajevo.

Predsjednica Skupštine konstatuje da je svim članovima uredno dostavljen poziv za održavanje redovne Skupštine sa dnevnim redom i materijalima za rad na Skupštini (8.12.2017.). Poziv za skupštinu je objavljen u dnevnom listu Oslobođenja (10.12.2017.), na zvaničnoj web stranici Udruženja (8.12.2017.) i društvenoj mreži Facebook. Predsjednica konstatuje da sjednici Skupštine prisustvuju 22 redovna člana, što čini kvorum i omogućava neometani rad i punovažno odlučivanje Skupštine. Predsjednica izvještava da je pristiglo i 7 (sedam) glasačkih listova u odsustvu, koji će se pribrojiti glasovima po pojedinim tačkama Dnevnog reda.

Ad 1. Skupština je usvojila sljedeći Dnevni red:

1. Usvajanje dnevnog reda
2. Izvještaj o radu Udruženja Original u 2017.godini
3. Odluka o razrješenju i imenovanju 2 (dva) člana Upravnog odbora Udruženja Original
4. Odluka o razrješenju i imenovanju 1 (jednog) člana Nadzornog odbora Udruženja Original
5. Odluka o usvajanju novog Poslovnika o radu Skupštine Udruženja Original
6. Odluka o prijemu u redovno članstvo prema pristiglim Pristupnicama
7. Usvajanje informacija:
 - planirane aktivnosti rada Udruženja Original za period 2018.godine (kolektivno ostvarivanje prava);
 - finansijsko poslovanje Udruženja Original;
 - promjena sjedišta (adrese) Udruženja Original
 - članstvo u međunarodnoj stručnoj organizaciji *International Federation of Reproduction Rights Organisations*.
8. Ostala pitanja.

Prisutnima se obratio Predsjednik Udruženja Goran Simić, pozdravio je sve prisutne članove i poželio uspješan nastavak rada Udruženja. Istakao je zadovoljstvo zbog uspješno okončanog postupka dobijanja dozvole za kolektivno ostvarivanje prava na naknadu za privatnu i drugu vlastitu upotrebu pisanih djela.

Ad 2. Izvještaj o radu Udruženja u 2017.godini je podnijela Lejla Gačanica, generalna sekretarka udruženja. Predstavljene su aktivnosti koje je Udruženje imalo u 2017.godini na ispunjavanju uslova za dobijanje dozvole Instituta za intelektualno vlasništvo za kolektivno ostvarivanje prava te podaci o izradi repertoara, proširenje članstva, međunarodna saradnja.

Ad 3. Predsjednica Skupštine izvještava da su dva člana Upravnog odbora odlučila dobrovoljno da istupe iz ovog organa kako bi se omogućila regionalna zastupljenost članova. Kako je Udruženje Original od svog osnivanja pa do danas obogaćeno novim članovima iz cijele BiH, ovim putem se otvara prostor da se u organe Udruženja uključe i članove koji su se naknadno priključili, a kako bi se omogućila bolja zastupljenost svih članova/ica u organima i radu Udruženja. Iako su trenutni članovi

organa Udruženja Original izabrani na mandat od 4 (četiri) godine, dva člana Upravnog odbora Haris Alić i Budislav Vojinović, ovim putem istupaju a otvara se glasanje za nove članove UO .

Pozivom za kandidaturu u organe Udruženja (upućen svim redovnim članovima 1.12.2017.godine) otvorene su pozicije za dva člana Upravnog odbora. Svoje kandidature su dostavili:

Predrag Bjelošević, Udruženje književnika Republike Srpske iz Banja Luke

Bajruzin Hajro Planjac, Planjax Group, Tešanj

Nenad Novaković, Udruženje izdavača Republike Srpske iz Banja Luke

Glasanjem prisutnih (22) i glasovima u odsustvu (5, 2 nevažeća jer su odabrani svi kandidati), *skupština je izabrala nove članove Upravnog odbora: Predrag Bjelošević (24) i Nenad Novaković (26).*

Ad 4. Isto kao za Upravni odbor, Nadzorni odbor će također omogućiti regionalna zastupljenost zbog čega jedna članica dobrovoljno istupa. Šejla Šehabović istupa iz Nadzornog odbora a pozivom za kandidaturu u organe Udruženja (upućen svim redovnim članovima 1.12.2017.godine) otvorena je pozicija za člana Nadzornog odbora. Svoju kandidaturu je dostavilo Boris Maksimović, Imprimatur d.o.o. Banja Luka.

Skupština je jednoglasno (prisutni i glasovi u odsustvu) usvojila kandidaturu, čime je Boris Maksimović izabran u Nadzorni odbor.

Ad 5. Poslovnik o radu skupštine Udruženja ORIGINAL za ostvarivanje i zaštitu reproduksijskih prava broj 14/16 od 16.11.2016.godine je izmjenama Statuta od 22.6.2017.godine u određenim dijelovima neusaglašen te ga je potrebno uskladiti. Prijedlog novog Poslovnika o radu skupštine je dostavljen u materijalima za rad skupštine te su ga svi članovi mogli pregledati. Predsjednica skupštine poziva na eventualne komentare i prijedloge povodom predloženog teksta novog Poslovnika. Damir Uzunović predlaže izmjenu člana 4. Prijedloga Poslovnika u dijelu koji se odnosi na termine za redovne skupštine Udruženja, tako da prva redovna godišnja skupština bude održana do 20.juna a druga do 20.decembra (na svakih šest mjeseci).

Skupština je jednoglasno (prisutni i glasovi u odsustvu) usvojila Poslovnik o radu skupštine sa izmjenom u čl.4.

Ad 5. Predsjednica Skupštine obavještava da su pristigle dvije nove uredno popunjene Pristupnice za članstvo u Udruženju: Berin Tuzlić i Udruženje za art i vizualno komunikacijske vještine PIXEL, Sarajevo. Prema odredbama Statuta, redovnim članom može postati isključivi nositelj prava na naknadu za privatnu i drugu vlastitu upotrebu djela, bez obzira da li je fizičko ili pravno lice, a koji je povjerio Udruženju ostvarivanje svojih prava zaključivanjem ugovora – pristupnice. Odluku o prijemu u članstvo donosi Skupština Udruženja u skladu sa odredbama Statuta i Pravilnika o radu Skupštine. Udruženje ne može odbiti zahtjev za članstvo iz oblasti svoje djelatnosti (kolektivno ostvarivanje prava na naknadu za privatnu i drugu vlastitu upotrebu pisanih djela), osim ako je nosilac prava već sklopio ugovor za kolektivno ostvarivanje svojih prava u BiH iz oblasti djelatnosti Udruženja sa stranom kolektivnom organizacijom.

O prijemu u članstvo Skupština je glasala jednoglasno za obje dostavljene pristupnice.

Ad 6. Usvajanje informacija se odnosi na nekoliko različitih aspekata rada Udruženja te ih Predsjednica poziva pojedinačno na predstavljanje:

- a) Predsjednik Nadzornog odbora, Ivica Rorić, predstavlja planirane aktivnosti Udruženja za narednu godinu a u skladu sa izvještajem o radu Udruženja u 2017.godini i ciljevima. Udruženje će u toku 2018.godine aktivno raditi u dvije oblasti za koje je dobilo dozvolu Instituta za intelektualno vlasništvo: Pravo na naknadu koja se plaća pri prvoj prodaji ili uvozu

novih uređaja za fotokopiranje i Pravo na naknadu od izrađenih fotokopija namijenjenih za prodaju, koju plaćaju fizička i pravna lica koja uz naplatu obavljaju usluge fotokopiranja. Ono što će biti popratne, nužne, aktivnosti u cilju uspostavljanja sistema kolektivnog ostvarivanja su promotivne aktivnosti – ovo su prava koja se ostvaruju prvi put i mora se obezbijediti njihovu vidljivost i razumijevanje. U tom smislu će biti preuređena web stranica, ali i izrađeni informativni obrasci/flajeri te po uzoru na dobra iskustva drugih kolektivnih organizacija u BiH – obavještenja putem radija, on line medija i društvenih mreža.

- b) Predsjednik Upravnog odbora Damir Uzunović predstavlja trenutni način finansiranja Udruženja, te u skladu sa prethodnom informacijom o predviđanjima za ubiranje naknada putem kolektivnog ostvarivanja prava. Za rad Udruženja, do početka naplate, sredstva su osigurana putem pozajmica osnivača (Buybook, Ivica Rorić, Nova Dječija knjiga) i iz tih sredstava se i trenutno finansira. Ova sredstva se moraju vratiti onda kada Udruženje bude ostvarivalo prihod a cilj im je omogućiti finansijsku osnovu za početni neometani rad udruženja. Dosadašnji rad je bio izuzetno štedljiv i vođen sa minimalnim trošenjem novca no po dobijanju licence aktivnosti Udruženja se moraju povećati kako bi se uspostavio sistem kolektivnog ostvarivanja ovog prava.

Predsjednik UO informiše o potrebi usvajanja finansijskog plana za narednu godinu. Članovima je upućen prijedlog Finansijskog plana za 2018.godinu a koji je urađen u skladu sa zakonskim propisima i međunarodnim standardima u ovoj oblasti. Zakon vrlo jasno propisuje koliko kolektivna organizacija (Udruženje) može potrošiti od ukupno prikupljenog novca – u prvim godinama do 30%. Statut Udruženja, u skladu sa zakonom, također propisuje da „Prihod ostvaren od naknada za korištenje autorskih djela i predmeta srodnih prava koje se naplaćuju od korisnika mogu se koristiti isključivo za raspodjelu nosiocima prava (autori i izdavači) u skladu sa usvojenim Pravilnikom o raspodjeli i planom raspodjele, a u skladu sa djelatnostima Udruženja. Od svih ostvarenih prihoda Udruženje odvaja samo sredstva za pokrivanje materijalnih troškova svog rada, a sva druga sredstva je dužno usmjeriti u realizaciju svojih ciljeva“. Statut predviđa i osnovna pravila za raspodjelu (autorima i izdavačima) no detaljan Pravilnik o raspodjeli će donijeti Skupština i u njemu će biti utvrđena pravila i razrađen način raspodjele novca.

Prema prijedlogu Finansijskog plana za 2018.godinu predviđeni prihodi su u iznosu 318.000 KM, a predviđeni rashodi u iznosu 95.253,57 KM. Detalji prihoda i rashoda su sadržani u prijedlogu Finansijskog plana koji je dostavljen članovima. U zavisnosti od procjene, ovi rashodi se mogu i smanjiti u toku godine (ili povećati) ali moraju ostati u okviru 30% ukupno ubranog novca (prihoda). Iz sveg ostalog prikupljenog novca će biti oduzet dio pozajmica (24.000 KM), po odluci Skupštine moguće predvidjeti i 10% za socijalne i kulturne namjene, a sve ostalo ide u raspodjelu nosiocima prava (autori i izdavači).

Udruženje obavlja obračun i isplate naknada nosiocima prava jednom godišnje i to do 30. aprila sljedeće godine za proteklu godinu. S obzirom da se u 2018. godini očekuju prvi prilivi autorskih naknada za reprodukcijna prava na pisana djela, prva raspodjela prikupljenih prihoda će biti realizirana u 2019. godini.

Predsjednica Skupštine, u skladu sa članom 19. Statuta konstatuje da je o ovoj podtački potrebno glasanje Skupštine te poziva da se glasa.

Skupština je jednoglasno usvojila Finansijski plan za 2018.godinu (prisutni i glasovi u odsustvu).

- c) Predsjednica Skupštine izvještava da će se zbog efikasnijeg poslovanja sjedište Udruženja premjestiti u prikladniji prostor. Nova adresa Udruženja je TRAMPINA 4 zvanično od 1.1.2018.godine. Skupština je saglasna da se izvrše izmjene u Statutu u pogledu sjedišta Udruženja. Predsjednica Skupštine nalaže da se izvrše izmjene u tom pogledu Registru udruženja kod Ministarstva pravde BiH.

